

**TEKS UCAPAN
YANG BERBAHAGIA
PROFESOR DATUK DR. HAJAH ROZIAH MOHD JANOR
NAIB CANSOLOR UiTM**

**SEMPENA
MAJLIS PERASMIAN PENUTUP
EKSPLO SELANGKAH KE UiTM 2023**

**11 JUN 2023 AHAD,
3 PETANG
DEWAN AGUNG TUANKU CANSOLOR**

Terima kasih, Pengacara Majlis.

بِسْمِ اللَّهِ الرَّحْمَنِ الرَّحِيمِ

**ALHAMDULILLAHI ROBBIL 'AALAMIIN
WASOLAATU WASSALAAMU 'ALAA ASYRAFIL ANBIYAAI WAL
MURSALIIN
WA 'ALAAALIHI WASOHBIBI AJMA'IN.**

- Barisan Pengurusan Eksekutif Universiti
- Barisan Pengurusan Kanan Universiti
- Kakitangan Akademik dan Pentadbiran
- Para Ibu Bapa, Penjaga dan Bakal-bakal pelajar yang dihormati sekalian.

[SALUTASI- kemaskini berdasarkan kehadiran]

**Assalamualaikum warahmatullahi wabarakatuh,
Selamat sejahtera dan salam Malaysia Madani.**

1. Alhamdulillah, segala puji dan syukur ke hadrat Illahi kerana dengan limpah rahmat-Nya, dapat kita bersama-sama hadir menjayakan Majlis Perasmian Penutup Ekspo Selangkah ke UiTM 2023 pada petang ini.

2. Pada kesempatan ini, saya mengalu-alukan kehadiran ibu bapa dan penjaga, serta tidak lupa kepada bakal pelajar, ke UiTM Shah Alam. Untuk pengetahuan para pengunjung, UiTM Shah Alam ialah kampus induk bagi seluruh sistem UiTM, universiti yang berintensifkan ketampakan akademik melalui penyelidikan, inovasi, pengkomersialan dan penglibatan masyarakat.

3. Saya ingin mengucapkan tahniah kepada para pelajar yang baru-baru ini telah memperolehi keputusan Sijil Pelajaran Malaysia (SPM) dan Sijil Tinggi Persekolahan Malaysia (STPM).

4. Saya juga ingin mengucapkan ribuan terima kasih kepada **Bahagian Pengambilan Pelajar dan Jabatan Komunikasi UiTM** selaku penganjur utama **Ekspo Selangkah ke UiTM 2023** yang berlangsung selama dua hari bermula semalam dan berakhir hari ini. Tahniah dan syabas atas kerjasama menganjurkan acara ini.

Para pengunjung sekalian,

5. Penganjuran Ekspo Selangkah ke UiTM ini dilihat sebagai satu usaha berterusan UiTM dalam membantu mempromosikan program UiTM kepada bakal pelajar lepasan SPM dan STPM. Dari penganjuran ini, bakal pelajar dapat mengenali kesesuaian program dengan minat dan kelayakan mereka.

6. Melalui platform ini, bakal pelajar dan ibu bapa didedahkan dengan maklumat program pengajian yang telah disampaikan melalui taklimat, sesi penerangan serta pertemuan bersemuka dengan wakil fakulti dan kolej pengajian.

7. Diharapkan **Sistem Selangkah UiTM** yang boleh dicapai melalui selangkah.uitm.edu.my digunakan oleh bakal pelajar untuk menyemak syarat kelayakan sebelum memuktamadkan pilihan.

8. Dengan kehadiran 35 pempamer yang terdiri daripada kolej pengajian, fakulti, pusat akademik dan agensi-agensi luar, saya melihat sinergi melalui kolaborasi dan kerjasama yang erat ini diharapkan dapat mencapai matlamat yang dirancang kepada kumpulan sasaran dan komuniti. Dengan adanya ekspo ini, saya mengharapkan bakal pelajar dapat mengetahui dan memilih program-program bersesuaian dengan minat dan syarat kemasukan.

9. UiTM mempunyai **lebih daripada 500 program** akademik yang ditawarkan di seluruh kampus UiTM setiap negeri. Pada sesi kemasukan 2023/2024 ini, UiTM mensasarkan unjuran pengambilan seramai **65,000 bakal mahasiswa**. Justeru itu, bagi merealisasikan unjuran ini, ekspo bukan sahaja diadakan di UiTM Shah Alam, malah turut diadakan di setiap kampus cawangan.

10. Pencapaian UiTM serta peningkatan peratusan kebolehpasaran graduan UiTM terkini yang mencatatkan **89.4 peratus** akan menjadi faktor penyumbang kepada bakal pelajar untuk menyambung pengajian di UiTM.

11. Untuk pengetahuan semua, UiTM tersenarai dalam **QS World University Rankings by Subject 2023**, bagi 13 subjek. Antaranya, subjek Pengurusan Hotel dan Pelancongan berada di kedudukan **100 terbaik dunia**, subjek Kejuruteraan Petroleum di kedudukan **150 terbaik dunia**, subjek Seni Bina dan Alam Bina berada pada kedudukan ke **151-200 terbaik dunia** serta subjek Seni Lukis dan Seni Reka di kedudukan **240 terbaik dunia**.

12. Saya yakin, dengan pencapaian UiTM ini, ibu bapa dan bakal pelajar bolehlah memilih dan menerima UiTM sebagai gedung ilmu untuk membina masa depan.

Hadirin sekalian,

13. UiTM sentiasa mencari peluang untuk bertemu ibu bapa dan orang awam bagi menerangkan perkembangan dan pencapaian UiTM. Untuk makluman semua, pada setiap tahun, kami menganjurkan banyak acara penting yang menemukan universiti dengan *stakeholders*. Antaranya ialah, Ekspo Selangkah ke UiTM. Melalui acara Ekspo ini, ibu bapa, bakal pelajar, dan orang awam diperkenalkan dengan program – program yang ditawarkan. Bukan itu saja, penerangan mengenai perkembangan dan pembangunan universiti dapat disalurkan kepada masyarakat agar semua tahu kewujudan UiTM ini kekal relevan, dirujuk dan dipercayai.

14. Selain daripada itu, acara istiadat konvokesyen juga merupakan acara penting yang menemukan UiTM dengan ibu bapa. Dalam kedua-dua acara besar ini, UiTM mengambil peluang untuk menyalur dan berkongsi banyak pencapaian dan halatuju universiti.

15. Saya amat berharap agar bakal mahasiswa dapat mengambil peluang sebaik mungkin atas penganjuran

ekspo ini. Maklum dan berkongsilah dengan saudara mara dan rakan-rakan lain, seramai mungkin, agar segala maklumat yang anda peroleh dapat dimanfaatkan bersama.

16. Sekali lagi, saya ingin ucapkan terima kasih kepada semua pengunjung. Saya difahamkan, **setakat jam 3 petang tadi** seramai **11,520** pengujung telah hadir di ESKU 2023 ini. Sekali lagi Syabas kepada semua barisan ahli Jawatankuasa Penganjur yang telah berusaha bersungguh-sungguh bagi memastikan kelancaran ekspo ini.

17. Semoga Allah SWT membalas usaha yang telah diberikan dan menerima ganjaran terbaik di dunia dan akhirat.

18. Akhir kata, saya dengan penuh takzim merasmikan penutupan Ekspo Selangkah Ke UiTM 2023.

Sekian.

Wabillahi Taufiq Wal Hidayah Wassalamualaikum Warahmatullahi Wabarakatuh.

